

Yungzsuij: Ciet Bauqva Ndwenngeih Co' ngeih Yinx Bouxhek Daeuj

Ndwen 3 ngoenz 8, Yungzsuij Myauzcuz Swciyen Dungdouz Yangh dieg youq gapgyaiq Gvangjsih Gveicouh neix gvaq ciet bauqva “ndwenngeih co' ngeih” bi gvaq baez haenx. Aen ciet neix dwg aen ciet cienzdoengj ceiq hung dangdieg, 2 fanh lai boux vunzlai mbanj henzyawj gapgyaiq Gvangjsih caeuq Gveicouh caeuq bouxhek caemh angqhoh ngoenzciet. Haiguh ciengj bauqva, cien vunz Dungcuз diuq dohyeh, boq venz diuq fouxcaijdangz, guh doengznieng, foux saeceij daengj baenzdauq minzsuz hozdung daegsaek, cezmuz ndeiyawj dangqmaz.

Geij bi neix daeuj, riengzdwk dangdieg lijyouz canjnieb hwnghat, ciet bauqva dangguh aen minzsuz hozdung gig miz daegsaek ndawde aen ndeu, gaenq baenz diemjrongh lijyouz dangdieg. (Siz Fungh/石峰)



▲Gyoengqvunz cingq ciengj bauqva.



▲Beixnuengx Myauzcuz caeuq bouxhek caemh boq venz diuq foux.



▲Bouxgagnyienh son gyoengq hag-seng baenzlawz faenbied ngaenzgyaj.

Vanzgyangh:

Ginhyungz Cihsiz Haeuj Hagdangz Gagnyienh Fugsah Langh Yienghndei

Ndwen 3 ngoenz 6, Yinzminz Ngaenzhangz Vanzgyangh Mauznanzcuz Swciyen Cihhangz caeuq Vanzgyangh Sinyung Lenzse cujiz doih fugsah gagnyienh hojsingh ginhyungz, bae daengz Daanh Yangh Cungsim Siujyoz haiguh aen hozdung bi 2019 “ndwen gagnyienh fugsah hag Leiz Fungh” nem “mehmbwk ginhyungz langh yienghndei, ginhyungz cihsiz haeuj hagdangz”.

Mwh hozdung, bouxguh Hong doenggvag gangj PPT, fat ceksaу senhconz daengj hingzsiк son gyoengq hagseng hag roх faenbied “it yawj ngeih lumh sam caek” mbaw ngaenz guek raeuz caeuq bouxvunz cwnghsin, ginhyungz ancienz daengj ginhyungz fuengmienh cihsiz, demgiengz gij yisiz cwnghsin caeuq gij yisiz fangzung fungyiemj ginhyungz gyoengq hagseng, laebhwnj gij gvanhnen siufeiq caeuq gvanhnen ginhyungz cingqdeng. Ngoenzhaenx, Yinzminz Ngaenzhangz Vanzgyangh Mauznanzcuz Swciyen Cihhangz caeuq Vanzgyangh Sinyung Lenzse lij giensoengq ngaenz banghag “cwnghsin” caeuq buек doxgaiq diyyuz yungh ndeu hawj Daanh Yangh Cungsim Siujyoz dem.

(Veiz Yui/韦睿)

Lozcwngz: Hag Raed Ceij Coux “Sam Bet”

Ndwen 3 ngoenz 7, Lozcwngz Mulaujcuz Swciyen Fulenz banh aen ban son-gyauq dinfwngz raed ceij, cawjdaez dwg “swnjcienz vwnzva minzcuz, fatyengz gyahfungh ceiq gyaеu”, iucingj bouxswnjcienz raed ceij feihvuzciz vwnzva yizcanj Mulaujcuz Loz Vazcingh daeuj son 50 lai boux mehmbwk raed ceij, angqcoux ciet mehmbwk gozci “sam bet”.

(Mungz Cwnghsw/蒙增师)



▲Loz Vazcingh(gvaz it) cingq son mehmbwk raed ceij.

Lungzswng: Giensoengq Dinyouzcaz Bang Vut Gungz



▲Bouxguh Hong fat dinyouzcaz hawj vunzlai.

Ndwen 3 ngoenz 9, Gvangjsih Bouxcuengh Swcigih Yinzminz Yihyen bae daengz mbanj lienzhaeh banggunz Lungzswng Gak Cuz Swciyen Bingzdwngj Cin Bauzdenz Cunh haiguh aen hozdung giensoengq dinyouzcaz simndei cinjeing bangfuz, fat 5 fanh lai go dinyouzcaz hawj aen cunh neix, gyaqcienz dij 18 fanh maenz, bangrenz vunzlai gungz-hoj aen cunh neix laisou vut gungz. Geij bi neix daeuj, aen yienh neix Bingzdwngj Cin haenqrenz hwnghat ndaem youz-caz, daengx cin ndaem youzcaz najdieg daengz 5 fanh moux, dan Bauzdenz Cunh couh miz 5 cien lai moux, rengzrwd daiq vunzlai vut gungz baenz miz.

(Vuz Swnghbinh Liuz Yaujyi/吴生斌 刘晓玉)